

曾文正公奏稿

卷之二十五

公奏稿

卷之二十五 目錄

東垣防軍截賊獲勝摺

同治三年四月二十七日

徽州防軍截賊獲勝摺

全日

近日軍情片

鮑超請假葬親摺

五月十二日

近日軍情片

遵旨會師籌勦金陵摺

五月二十二日

奉旨覆奏并陳近日軍情摺

五月二十七日

覆陳金陵皖北江西各路軍務籌辦情形摺

六月十二日

金陵克復全股悍賊盡數殲滅摺

六月二十三日

賊酋分別處治贛籌善後事宜宣摺

七月初七日

謝錫封侯爵 恩摺

七月十六日

李臣典病故請卹摺

七月二十日

覆陳賊酋正法片

近日軍情擬裁撤湘勇片

停止廣東釐金摺

七月二十九日

裁撤湘勇查洪福瑱下落片

近日軍情片

東壩防軍截賊獲勝摺

同治三年四月二十七日

奏爲東壩防軍截擊丹陽上竄之賊大戰獲勝恭摺馳報仰祈  
聖鑒事竊自丹陽一城經富明阿馮子材會師攻復後僞顯王  
甘王及僞忠王二殿下等巨酋糾敗賊三四萬眾由天皇寺進  
竄木家莊大山頭一帶以圖犯我東壩并分枝由漆橋進竄塘  
溝固城湖一帶以圖犯我高淳四月十三日水師營官柳壽田  
乘賊未及盡濟迎擊於固城湖敗之遂約高淳守將蕭信集戴  
德祥等追擊於楊村又敗之賊大怖遁回漆橋時鮑超引軍自  
句容出溧水正欲馳諭譚勝達率東壩各營先剿大山頭一股  
仍親督騎隊專剿漆橋一股詎行抵漆橋賊已合股併向東壩

易經卷之二  
一路四月十四日譚勝達商之吳雲集鄧訓誥李文益曾成武  
黎光照行營幕食出隊天未曙也少頃師次安興遙見山谷中  
賊旗林立若遠若近迎面撲來諸將士奮勇直前燃槍環擊賊  
乃全無怯志前股少卻後股繼至往來猛鬪十餘次更以賊馬  
分兩翼抄出勢益剽悍譚勝達於敵騎衝突之際橫躍入陣徑  
取中路抽刃奮刺立梟數酋賊氣爲奪吳雲集見中路搏鬪方  
酣卽以所部向左路大呼疾馳左脇已受重傷猶復與曾成武  
麾兵疾進截賊數段乘勢追過右路而右路聚賊尤眾洋礮排列  
擁護一酋各奔勇指曰此渠魁也鄧訓誥策馬當先突出斬  
之中左兩路之賊奔救不急譚亂欲遁適李文益從山後掩至

黎光熙亦節節掃蕩而來各營會合併力長驅勢不可遏自逆率悍黨在高岡督陣正思折隊返走不料我軍飈馳電掣一擁即至亂鋒交下死者山積賊乃大潰軍士踐尸而過逐出三十里外始各回軍下壩旋有匪來自漆橋適與我軍相值不敢尋戰捲旗急行比至定埠又爲易華元師船所截頗有斬擒餘黨悉向湖州廣德竄去是役斃賊約七千人中有僞王等十七人均搜出僞印解至安慶據譚勝達稟報由提督鮑超轉呈前來臣查丹陽各賊股意在衝出東壩由皖南併竄江西經鮑超飭令譚勝達等督軍痛剿雖未能悉數翦除而下游多殺一賊卽上游少竄一賊挫此兇鋒亦屬有裨大局現准李鴻章來

咨已派劉銘傳十二營接守句容鄭國魁水陸五營接守東壩  
鮑超俟蘇軍到防後擬卽親統全隊刻日上援江西臣亦於滬  
餉贛餉中撥銀十萬兩解交鮑超以作途費冀速師行而慰民  
望此次出力員弁仍請附入東壩句容各案內彙保優獎以勵  
軍心其陣亡及前案續查人員另開清單請

旨敕部議卹所有東壩一軍截擊竄賊獲勝緣由謹繕摺由驛  
五百里具陳伏乞

皇太后

皇上聖鑒訓示謹

奏

徽州防軍截賊獲勝摺

同治三年四月二十七日

奏爲蘇賊續竄徽州官軍擊剿屢勝餘眾潰散恭摺馳報仰祈  
聖鑒事竊僞聽王陳炳文僞侍王李世賢等先後由浙犯徽由  
徽入江臣於四月十二日詳陳戰狀在案嗣報徽州南路復有  
賊至詢其酋目爲僞烈王林逆麟王朱逆及僞爵潘忠義李石  
黃宗保等究其來路蓋江陰楊舍之敗賊常州城外之壘賊常  
郡合圍以後該逆等不能入城由丹陽湖州而上竄者也乃從  
昌化進老竹嶺關入歙境大阜七賢方村等處距郡城三四十  
里四月初十日徽郡守將唐義訓率所部六營馳出城南爲迎  
頭截剿之謀賊眾懼而東趨擾及臨溪孔靈一帶擒賊狡計必

將出藍田鍾塘嶺富竭繞郡城而西也乃馳函告金國琛毛有  
銘各以所部來會是夜三更唐義訓以一營伏鍾塘嶺後十一  
日昧爽以五營進遇賊接戰伏軍并發殲其前鋒是時金國琛  
毛有銘畱兩營守休甯會帶馬步十二營行抵富竭隔河而屯  
傳餐未畢賊遽以大股虧至山岡上下若蟻若蠅金國琛等令  
王俊南爲中路衝鋒羅盛典佐之趙仁和爲左路衝鋒楊啓益  
佐之葛清泰爲右路衝鋒王玉藻李致和佐之仍親督李贊勳  
馬隊羊寅洪良輝步隊爲諸路策應部勒旣定姑不出戰俟賊  
涉水將半一聲號礮突出奮擊賊特眾惶搶上隄埂我軍猛撲  
猛進更以騎卒沿隄包抄正酣戰閒唐義訓適從鍾塘嶺尾賊

而至兩面夾攻賊卽不支緣山亂竄各營奮力追殺俘斬千餘人解散不可勝計逸出之賊方由呈坎遁向黃山小路復於十二日爲唐義訓所敗此四月十二等日鍾塘嶺富堨等處剿賊獲勝之情形也賊旣趨重黃山則歟休之北黟縣之東均形喫重十三日我軍向漁亭併進唐義訓爲前茅毛有銘繼之金國琛又繼之馳抵五弓橋賊已揚旗怒馬而來唐義訓先與交鋒毛有銘金國琛分路剽擊窮寇苦戰銳不可當唐義訓率隊上山抄過賊後毛有銘等揮令各營從溪河上流大呼衝入斬馘無算駢尸塞流正擬入山追剿而日斜士餓乃分軍少息齊雲山之麓俄而賊旗隱現右側山衝忽出一枝我軍再起破之

餘匪退遁藍田山溪一帶是夜月色正明唐義訓派隊赴南渡循河直上以一營在西館傍山埋伏一營在西館對岸埋伏一營在渭橋山後埋伏一營向巖腳林際埋伏比至天曉金國琛毛有銘等亦率各營自五弓橋銜枚疾進賊半在西館過河半在南渡過橋我軍鼓角齊鳴一擁而上各山伏兵突出殺聲大震羣賊驚亂不復成伍其未及渡者眾軍蹙之入水其已渡者爲渭橋巖腳之軍所截前股擊散後股續至奪路狂奔生擒林義等十酋陣斬潘忠義等十四酋死者散者實有二萬餘眾所剩敗殘零賊潛向上溪口紛紛南竄不過二三千人而婦女輜重馬匹器械拋棄略盡此十三四等日五弓橋西館等處搜剿

大勝之情形也伏查本年正月以來蘇浙諸賊已三次衝出徽境併竄江西江省防軍已有應接不暇之勢此次續股上竄各軍積愧生奮撻斬解散約去十分之八入江之匪無幾軍威爲之一振在事出力員弁可否容臣<sub>酌量</sub>保獎之處出自

聖裁陣亡將弁查明彙案辦理所有徽軍擊賊獲勝緣由謹繕  
摺由驛五百里具陳伏乞

皇太后

皇上聖鑒訓示謹

奏

近日軍情片

同治三年四月二十七日

再蘇浙羣賊由徽上竄者約分六起第一起爲僞涪王等係溧陽宣興敗出者溧陽本僞侍王老巢故涪逆侍黨也現尙踞江西之南豐縣城暨分竄汀州等處第二起爲陳炳文汪海洋等係杭州敗出者輜重最多隊伍頗整餘杭武康德清石門各股皆附之以行現尙延擾於鉛山之湖坊陳坊等處第三起爲僞侍王來自湖州由徽入江攻陷弋陽四月十六七等日圍撲撫州旋退至金谿之許灣將與南豐股匪合爲一路第四起爲江陰楊舍之敗賊常州城外之壘賊卽唐義訓金國琛等軍十三四日在歙休境內所破者也其金壠句容敗出之賊是否在內

尙未可知常州克城之時各頭目與兩粵老賊均就駢誅無一漏網不至貽患於上游至從丹陽逸出之賊雖在東霸一敗而餘黨悉趨廣德湖州是將爲第五起而湖州堵輔二悍酋徒黨尚眾又將爲第六起揣其勢要無不圖竄徽境併犯江西欽奉

四月十九日

寄諭鮑超一軍自可騰出移援徽郡或卽令渡江北防剿潛太  
英霍桐舒一帶仰見

聖謨廣運先事豫防惟查目下賊情究以江西爲最重而江西之待援實比皖北爲尤急鮑超全隊四月必可成行五月當可到江自不宜改援皖北致辜江西軍民雲霓之望至周寬世金

國琛兩軍臣本檄令由饒景一帶援江旋因饒景數百里并無  
賊蹤侍逆南竄已遠乃改調周寬世等暫不赴江分駐祁門漁  
亭休甯等處以備迎堵續至之賊俟丹陽湖州廣德各股竄盡  
後再行馳入江西會剿所有近日軍情理合附片具陳伏乞

皇太后

皇上聖鑒訓示謹

奏

鮑超請假葬親摺

同治三年五月十二日

奏爲帶兵大員請假葬親恭摺額懇

天恩仰祈

聖鑒事竊署浙江提督鮑超於同治元年十一月二十日在甯國高祖山軍營聞訃丁母憂呈請奔喪回籍時值甯國境內自紅楊樹青弋江西河灣沚等處面面賊氛皖南全局震動鮑超獨當一路斷難離營經臣奏奉

諭旨俟江南軍務大定再由臣奏請給假回籍營葬鮑超一聞成命悲不自勝仍復公牘私函再三申請臣與之期約俟攻克西河灣沚保全甯郡後必當代爲陳奏上年二月臣巡閱沿江

營伍行次裕溪口鮑超迎謁舟中以西河灣沚并復翰郡肅清  
請踐前言情詞迫切聲淚俱下并稱臣與胡林翼李續宣三人  
丁憂均得邀

恩離營回籍治喪超母鞠育之苦迥異尋常懇爲援例聲請俾  
展孝思等語臣多方撫慰又與之期約待攻克東壩後始行具  
奏十月閒水陸諸軍奪取東壩一關而乞假之文旋至臣復婉  
詞批答囑其暫畱五箇月勉抑一時哀慕之忱以待金陵大勳  
之集如金陵逾期弗克亦必專疏籲求

恩准給假歸營葬事今年三月初閒五箇月之期又滿鮑超復  
以悽詞苦語懇請代奏臣查該軍赴援江西斷非一蹴所能了

事前次節節爽約致其家奄柩在堂久不克成歸窆之禮至此而再失信於鮑超竊懼此後之號令不復能示信於諸將矣目下江西軍務喫緊本不應率請離營惟鮑超部將如宋國永馮標樊雲慶諸鎮皆相從十年之久其餘驍將尙多足資剿辦頃

復欽奉

諭旨派楊岳斌督辦江西軍務鮑超係其舊日部曲卽令楊岳斌統率該軍以行必可指揮如意合無籲怨

天恩俯念鮑超苦戰功多賞假四箇月飭令暫回四川本籍俟營葬事竣迅卽回營俾展人子烏私之誼彌彰

聖朝孝治之隆所有帶兵大員請假葬親緣由謹繕摺由驛馳

陳伏乞

皇太后

皇上聖鑒訓示謹

奏

近日軍情片

同治三年五月十二日

再近日軍情湖州廣德各賊黨分踞如故尙無上竄之信賊之在徽州擊潰者由婺源德興併入江西道員王德榜率長左營截殺於弋陽境內大獲勝仗據稱賊眾數萬全股殲滅其所報賊數與徽軍所報敗遁僅有數千者多寡懸殊雖彼此均有不實不盡而此股賊勢之羸弱誅戮之將盡尙屬可信侍道一股攻破建昌之萬年橋卡以小枝牽制官軍以大枝疾趨而西疊陷宣黃崇仁兩縣卽在崇仁繕城擄糧爲久踞計凡樟樹鎮及豐城新淦峽江等縣處處喫緊省城戒嚴沈葆楨調湖口守將萬泰王定國管帶潯兵於五月初三日進省彭玉麟派喻俊明

張錦芳等亦自湖口各率師船駛入省河

臣飛檄周覽世銓字

七營從景鎮饒州雇船赴援必能先後趕到省垣重地必可無

虞鮑超一軍於初六日由蕪湖啓行擬取道湖口九江繞出樟

樹鎮迎頭遏擊與劉典王文瑞諸軍痛剿數次不使羣賊竄渡

贛江以西或不至有妨大局至鄂中髮捻現尙蔓延黃陂孝感

麻城一帶去皖甚近英霍潛太桐舒處處空虛

臣咨商李鴻章

分撥數軍接守建平溧水高淳三縣騰出李榕王可陞等軍渡

江而北扼繁桐舒以固藩籬惟輶轉調防有需時日不免有鞭

長莫及之慮所有江皖軍務情形謹由驛附陳大概伏乞

皇太后

皇上聖鑒訓示謹

奏

遵旨會師籌剿金陵摺

同治三年五月二十二日

奏爲遵奉

諭旨會師籌剿金陵恭摺覆陳仰祈

聖鑒事竊

臣

承准議政王軍機大臣字寄同治三年五月初八

日奉

上諭李鴻章所部兵勇攻城奪隘所向有功礮隊尤爲得力現  
在金陵功在垂成髮捻蓄意東趨遲恐掣動全局李鴻章豈能  
坐視著卽迅調勁旅數千及得力礮隊前赴金陵會合曾國荃  
圍師相機進取速奏虜功李鴻章如能親督各軍與曾國荃會  
商機宜剣辦更易得手著該撫酌度情形一面奏聞一面迅速

辦理曾國藩身爲統帥全局在胸尤當督同李鴻章曾國荃彭玉麟和衷共濟速竟全功埽穴擒渠同膺懋賞總以大局爲重不可稍存畛域之見等因欽此仰見

聖謨廣運指示周詳欽悚曷任自蘇常攻克之後臣本擬咨請

李鴻章親來金陵會剿特以該撫係封疆將帥之臣又值苦戰積勞之際非臣所敢奏調是以未及具疏上陳函商臣弟曾國

荃亦以師久無功愧悚無地不敢更求助於人近於畏難卸責始勤終怠者之所爲乃兩月以來百計環攻逼城太近被賊以洋槍狙擊我軍傷亡至四千餘人之多所挖地道十餘處已被該逆從內掘出穿透三洞此外諸洞亦難奏效前聞賊糧於五

月聲盡近來城中收割新麥又可支持數月是埽穴擒渠之期  
尙無把握而曾國荃焦勞致疾飲食漸減身發溼毒不便起坐  
餉項奇窘尤爲可慮聞蘇軍開花礮位無堅不摧其洋槍隊扒  
城攻壘無敵不破臣於五月十一日始咨調蘇軍之來句容等  
處者如郭松林劉銘傳兩鎮酌帶開花礮位輔以槍隊就近助  
攻金陵然猶未敢請李鴻章親來也今幸欽奉

寄諭飭李鴻章親督各軍西來會剿臣已恭錄

諭旨具咨加函催請李鴻章刻日馳赴金陵與曾國荃會商剿  
辦前接李鴻章來函言蘇軍將士太勞宜少休息待會克長興  
湖州再行選將撥兵助攻金陵等語然使僅請派將前來其知

者以爲憐該撫之過勞信蘇將之可恃不知者以爲臣弟貪獨得之美名忌同列之分功尤非臣兄弟平日報

國區區之意合無籲懇

天恩飭催李鴻章速赴金陵不必待七月暑退以後亦不必待攻克湖州之時金陵早破一日天下之人心早安一日俾髮捻東竄不至掣動大局餉項奇細不至更生他變實爲至幸提督鮑超黃翼升於五月初十一等日均來安慶接見一次臣飭鮑超速援江西十七日已至九江飭黃翼升速回金陵接統楊岳斌外江水師仍俟楊岳斌行抵江西換出彭玉麟所部師船駛赴下游謹遵會籌金陵之

命仍須迎顧上游兼防鄂省東下之賊臣於三月間本欲前往金陵督剿旋因徽州大警迄不果行此次湖北羣賊已竄過鄂皖交界之馬鞍山英霍潛太等縣一蹴卽至安慶首邑鄉民亦遷徙震動省會重地防兵單薄刻下未可暫離擬俟北岸軍事稍鬆臣於六月親赴金陵會同李鴻章彭玉麟曾國荃籌商攻剿倘屆時安慶警急亦卽乘坐輪船星夜上駛總當兼權緩急量而後動斷不敢顧彼失此致煩

宸廑所有遵

旨會剿金陵緣由謹會同兵部右侍郎臣彭玉麟浙江巡撫曾國荃繕摺由驛五百里馳奏伏乞

皇太后  
皇上聖鑒訓示謹奏

奉旨覆奏并陳近日軍情摺同治三年五月二十七日

奏爲續奉

諭旨恭摺覆奏并陳近日軍情仰祈

聖鑒事竊

臣承准議政王軍機大臣字寄同治三年五月十六

日奉

上諭此時賊勢固結不解必須將金陵迅速攻拔使該逆無所依附自成瓦解之勢前經屢諭李鴻章撥兵助攻金陵能否親往并令該撫酌辦現當事機緊要之時李鴻章務當不分畛域不避嫌怨迅速遵辦力圖共濟不准稍有推諉等因欽此又奉

五月十九日

上諭現在羣賊紛竄總當速拔金陵覆其巢穴曾國藩當嚴飭  
曾國荃督率所部奮力圖功不得再有稽延李鴻章恪遵前旨  
不分畛域撥兵助剿或親往會攻毋稍避嫌推諉前因曾國藩  
軍餉竭蹙諭令李鴻章將輪船經費銀五十萬兩全數撥歸該  
營旋據李鴻章奏據赫德聲稱現時只能湊解銀十五萬兩當  
飭江海關道趕緊起解等語迄今爲日已久尙未據曾國藩奏  
到究竟現存之十五萬兩曾否解赴安慶并著曾國藩查明覆  
奏等因欽此仰見

皇上眷顧東南刻刻廑念臣於五月十一日咨請李鴻章選派  
驍將酌帶開花礮位前來助剿旋奉

敕下李鴻章督軍會剿之

諭復於十五日具咨加函請其親來會辦均於五月二十二日  
專疏覆奏頃已鈔摺寄蘇加函催促李鴻章所派何隊現尙未  
報起程能否親赴金陵亦未接准咨覆據曾國荃來文神策朝  
陽兩門外所掘地道又被城賊從內挖出橫穿數處勇士傷折  
甚多金陵城厚且高迥非他城可比卽金川門左近俗號矮城  
者亦尙高至五丈以外是開花礮之能收效尙未敢必臣惟  
有倍加勤慎飛催李鴻章率師來會一面晝夜環攻一面嚴斷  
接濟俾令糧援并絕飛走路窮盡殲數萬堅忍之賊仰懾  
九重宵旰之憂前此奉撥輪船經費一項據代理江海關道應

寶時先後批解規平銀二十三萬八千兩有奇合庫平銀近二十二萬兩內以五萬兩分濟鮑超一軍以四萬兩提解安慶糧台餘十三萬撥歸金陵大營飢困之際獲此巨款正如久旱得雨莫不含哺而頌

皇仁惟此項銀兩轉瞬已罄正不敢謂籌餉之尙少而深悔募勇之太多惴惴焉恐生他變或誤大局既願李鴻章統兵以來助尤望其攜餉以相遺也至上游近日軍情賊之竄擾江西者自攻陷宜黃崇仁以後株守不出并未北窺省會西越贛江逃者頗多鮑超於二十一日單舟督省與撫正商一切其全隊由湖口渡湖將取道九江瑞州而進楊岳斌亦抽調水陸十營

前赴江西合之鮑軍共二萬餘人臣因江西兵力極厚不難盡殄寇氛改調周寬世一軍令赴皖北以防鄂省東竄之賊鄂賊現在麻城黃岡之交一搖足卽入皖境列城空虛殊深焦慮擬令陳國瑞駐繁壽州處淮南江北適中之地爲廬壽舒六游擊之師仍當防守要區嚴扼江而俾不得掣動金陵全局仰副諭飭諄諄之意所有續奉

諭旨并陳近日軍情謹繕摺由驛五百里覆奏伏乞

皇太后

皇上聖鑒訓示謹

奏

覆陳金陵皖北江西各路籌辦情形摺

同治三年六月十二日

奏爲欽奉

諭旨恭摺覆奏仰祈

聖鑒事竊臣自旬日以來厯奉

密諭殷殷指示不外迅剿金陵及皖北江西兩路軍務所有近  
日籌辦情形理合分晰詳對馳慰

宸廑如

諭旨飭令李鴻章俟長興得手後統率諸軍助攻金陵一節臣  
接李鴻章來咨教練礮隊尙須時日又以湖州賊眾蘇常毗連  
會攻金陵卽不能協剿湖州又謂天氣炎熱洋槍連放卽紅多

則炸裂開花礮放至十數出卽不能著手等語臣查李鴻章平  
白任事最勇進兵最速此次會攻金陵稍涉遲滯蓋絕無世俗  
避嫌之意殆有讓功之心而不欲居其名惟所稱全力助金陵  
則除畱防蘇境外更難協剿湖州係屬實在情形臣亦未便再  
三瀆催轉瞬新秋暑退該撫必可督兵親來屆時湖郡或已先  
下無復浙賊犯蘇之慮亦無槍礮紅裂之患矣

諭旨詢及聞中外匪徒仍有偷濟賊糧食軍火之事飭卽實力  
嚴防一節查金陵城大而堅重山複港引河穿城接濟極不易  
斷然自二月合圍以來陸路晝夜搜查據報已粒米不能入城  
水路百計防範終難淨絕至四月底始定上下民船三日放關

一次均派礮船護送除放關有期外不准一船往來臣頃面詢楊岳斌據稱五月以來江濱奸匪暗賣賊糧者實已絕蹤然水路六百六七十里臣何敢信其一無疏漏惟當諳飭各營加意嚴防近聞戈登語及白齊文暗回中國招集無賴雇備輪船將赴金陵助濟逆首此則意外之虞頗難防禦耳

諭旨以髮捻東趨飭調李榕王可陞等迅赴舒桐調周寬世移赴皖北一節查上游髮捻由孝感黃陂蔓延至麻城黃岡羅田等縣近已竄入英山境內臣前調蘇軍接防溧水高淳建平三城而檄三城防兵移駐舒桐等處旋據李鴻章撥營接守溧水高淳臣因調溧水王可陞一軍移駐無爲州楊岳斌帶高淳一

軍馳入江西惟建平非蘇所轄無兵接防臣又咨請李鴻章於  
新克長興各軍中分兵守建騰出李榕六營馳赴桐城并調李  
世忠舊部陳自明四營由池州馳禁廬江未知能否速到至周  
覽世一軍臣前因江西兵力足敷剿辦已改調該軍由江旋皖  
不謂軍檄未至而該提督已抵南昌適因東鄉不守南昌戒嚴  
經該省官紳合詞請畱又不得不先其所急令赴進賢防剿目  
下不能遽回皖北

諭旨以英霍喫緊去安慶不遠飭臣俟上游軍勢漸平即赴金  
陵督師一節查賊之由鄂趨皖意在掣動金陵全局果能扼守  
皖境卽所以協助金陵臣前次奏明擬於六月親赴下游籌商

攻剿現值鄂省各股竄近英霍  
到防安慶人心震動誠如

聖諭

臣

實

未可輕離惟有催集防軍設法堵遏俟皖北稍安李

鳴章會剿有期卽當馳赴金陵商辦一切以上四條皆蒙

宸衷座系謹將近日情形恭摺由驛五百里覆奏伏乞

皇太后

皇上聖鑒訓示謹

奏

同治三年六月二十三日

金陵克復全股悍賊盡數殲滅摺同治三年六月二十三日  
奏爲克復金陵全股悍賊盡數殲滅恭報詳細情形仰祈  
聖鑒事竊照官軍攻克金陵業經浙江撫臣<sub>曾國荃</sub>將大概情  
形於十六日亥刻會同<sub>臣</sub>等馳奏在案茲據曾國荃十九日咨  
稱此次攻城剿洗老巢之難與悍賊拚死廝戰之苦實爲久歷  
戎行者所未見自得天壘城後城中防守益密地堡城扼往隘  
路百計環攻無隙可乘直至五月三十日始經李祥和羅逢元  
王遠和黃潤昌陳壽武熊上珍王仕益等率隊攻克占取龍膊  
子山陰居高臨下勢在掌握自六月初一日起各營輪流苦攻  
傷亡極多李臣典偵知城內米麥尙足支持數月又見我軍地

三十餘穴都已無成官軍五萬餘人筋力將疲若不趁此攻克事久變生深爲可懼李臣興願率吳宗國等從賊礮最密之處重開地道肅孚泗黃潤昌熊登武王遠和願距城十數丈修築礮台數十座通派各營隊伍刈割溼蘆蒿草堆綑山積上覆沙土左路地勢甚高利於聲攻右路地勢極低利於潛攻如是者半月未嘗一刻稍休肉薄相逼損傷精銳不可勝數總兵陳萬勝王紹羲郭鴻程等素稱驍將數日之內次第陣亡尤堪憫惻十五夜四更地道裝藥之時曾國荃與李臣興正在洞口籌商一切忠酋李秀成突出死黨數百人由太平門傍城根直犯地道大壘別從朝陽門東角出數百人裝官軍號衣持火彈

燒各礮壘及附近溼蘆蒿草官軍久勞之後夜深幾爲所乘賴  
伍維壽李臣典黃廷爵張詩日堵住左路斃賊無算彭毓橋熊  
上珍陶立忠等堵殺右路擒斬亦多幸克保全洞口十六早嚮  
明曾國荃將四路隊伍調齊預飭各軍穩站牆濠嚴防衝突惟  
將太平門龍膊子一帶自黎明攻至午刻李臣典報地道封築  
口門安放引線曾國荃懸不貲之賞嚴退後之誅劉連捷朱洪  
章武明良伍維壽熊登武陳壽武李臣典張詩日各率營官席  
地敬聽願具軍令狀誓死報

國遂傳令卽刻發火霹靂一聲揭開城垣二十餘丈煙塵蔽空  
磚石滿谷武明良伍維壽朱洪章譚國泰劉連捷張詩日沈鴻

賓羅雨春李臣興等皆身先士卒直衝倒口而入各弁勇蟻附  
齊進銳不可當而左路城頭之賊以火藥傾盆燒我士卒死者  
甚眾大隊因之稍卻經彭毓橋蕭孚泗李祥和蕭慶衍蕭開印  
等以大刀手刃數人由是弁勇無一退者而武明良伍維壽朱  
洪章劉連捷譚國泰張詩日等各率隊伍登龍廣山與右路太  
平門之賊排列轟擊移時賊乃卻退李祥和王仕益從太平門  
月城攻入羣賊知此次地道缺口不復似前次之可以堵禦矣  
維時官軍分四路剿擊王遠和王仕益朱洪章羅雨春沈鴻賓  
黃潤昌熊上珍等進擊中路攻僞天王府之北劉連捷張詩日  
譚國泰崔文田等進擊右路由臺城趨神策門一帶適朱南桂

朱惟堂梁美材等亦率隊從神策門地道之旁梯攻而入相與會合齊進兵力益厚直廳戰至獅子山奪取儀鳳門其中左一路則有彭毓橘率羅朝雲趙濤河黃東南與武明良武明善武義山等由內城舊址直擊至通濟門左路則有蕭孚泗熊登武蕭慶衍蕭開印率蕭致祥周恆禮李泰山蕭清世蕭恆書朱吉玉趙太和劉長槐蕭上林等分途奪取朝陽洪武二門城上守陴城門守櫓之賊及附近一帶賊隊悉被殺戮其抄截疾馳各路同一神速其畱兵置守各門同一布置此十六日地道成功城中屢戰及東北兩路抄剿之情形也方我軍大隊之抵龍廣山也西南守陴之賊猶植立未動迨奪取朝陽門賊始亂次而

羅逢元張定魁彭椿年張光明楊西平何鳴高彭光友熊紹濂  
羅興祥葉路信等各率所部從聚寶門之西舊地道缺口仰攻  
而入李金洲胡松江朱文光武交清劉湘南易孔昭戴名山張  
正榮等率隊從通濟門月城緣梯而上而陳湜易良虎易良豹  
龍清垣率吳隆海張葉江晏恭山馮盛德陳汝俊劉定發各營  
則猛攻旱西水西兩門月城僞忠王李秀成方率死黨狂奔將  
向旱西門奪路衝出適爲陳湜大隊所阻退乃仍轉回清涼山  
江南提督黃翼升率許雲發等水師各營攻奪中關攔江磯石  
壘乘勝猛攻濱江之城遂與陳湜易良虎等奪取水西旱西兩  
門將守賊殲盡由是全城各門皆破大勢已定日色將暝陳湜

易良虎遙見忠酋賊隊隱匿西南房屋如鱗之內益戒所部嚴  
防賊衝彭毓橋置守聚寶門通濟門李臣典李祥和扼守太平  
門黃潤昌王遠和朱洪章等見星收隊結爲圓陣站立龍廣山  
稍資休息此水陸各軍攻克西南兩城及分守要隘預防賊股  
衝突之情形也方朱洪章等與賊搏戰於僞天王府城北之時  
沈鴻賓周恆禮袁大升等率隊從左路捲旗疾趨繞僞城之東  
設伏出奇爲擒渠埽穴之計迨朱洪章戰馬帶傷悍賊隱扼石  
橋我軍隊伍不能飛越城河繞僞城之西當日暮苦戰之後正  
兵收隊龍廣山而伏兵深入由僞城之東逶迤而南不能收隊  
時已三更矣僞忠王傳令羣賊將天王府及各僞王府同時舉

火焚燒僞宮殿火藥沖霄煙燄滿城袁大升周恆禮沈鴻賓等  
見僞殿前南門突出悍賊千餘人執持軍器洋槍向民房街巷  
而去知是洪逆竄至民房遂率隊腰截擊之殺賊七百餘人奪  
僞玉璽二方金印一方寬廣約七寸卽洪酋僭用之印也其僞  
宮殿侍女縊於前苑內者不下數百人死於城河者不下二千  
餘人其時僞城火已燎原不可嚮邇街巷要道賊均延燒塞衢  
官軍以暮夜路徑生疏不能巷戰遂收隊站城此十六夜攻破  
僞天王內城艱賊極多之情形也是夜四更有賊一股假裝官  
軍號衣號補手持軍器洋槍約千餘人向太平門地道缺口衝  
突經崑字湘後左右各營截擊多用火桶火彈焚燒人馬死者

已多約尙有六七百人騎馬衝出向孝陵衛定林鎮一路而逃  
伍維壽楊鉗南陶立忠等急率馬隊跟追曾國荃一聞騎賊裝  
扮官軍逃出之信卽加派張定魁李泰山黃萬鵬黃廷爵等馬  
隊七百騎追之并飛咨溧水東壠句容各守將會合追剿直至  
十九日酉刻伍維壽黃萬鵬等回營面稟追至淳化鎮生擒僞  
烈王李萬材帶領前進追至湖熟鎮見逃賊在前當經馬隊圍  
住全數斬刈未留一人又追至溧陽據百姓言前路并無賊蹤  
經過曾國荃親訊李萬材供稱城破後僞忠王之兄巨王幼西  
王幼南王定王崇王璋王乘夜衝出被官軍馬隊追至湖熟橋  
邊將各頭目全行殺斃更無餘孽又據城內各賊供稱首逆洪

秀全寶係本年五月閒官軍猛攻時服毒而死瘞於偽宮院內立幼主洪福瑱重襲偽城破後偽幼主積薪宮殿舉火自焚等語應俟偽宮火熄挖出洪秀全逆尸查明自焚確據續行具奏至偽忠王李秀成一犯城破受傷匿於山內民房十九夜提督蕭平泗親自搜出并搜擒王次兄洪仁達二十日曾國荃親訊供認不諱應否懸送京師抑或卽在金陵正法否請定奪其餘兩廣兩湖江北多年悍賊十七十八等日曾良佐周光正鄧吉山劉泰財瑞福厚譚信高胡克安朱連甲王春華黎冠湘彭維祥陳萬合朱連泗謝三洪李臣榮彭玉堂劉金蘭等分段搜殺三日之間斃賊共十餘萬人秦淮長河屍首如麻凡偽王偽

主將天將及大小首目約有三千餘名死於亂軍之中者居其半死於城河溝渠及自焚者居其半三日夜火光不息至十九日尙有賊踞高屋之頃以洋槍狙擊官軍者此馬隊竊追逸出之賊及搜剿首逆并羣賊之情形也現在派營救火掩埋賊尸安置難民婦女料理善後事宜百緒繁興竊念金陵一軍圍攻二載有奇前後死於疾疫者萬餘人死於戰陣者八九千人令人悲涕不堪回首仰賴

皇上威福迄今乃得收寸效等情由曾國荃咨報前來臣等伏查洪逆倡亂粵西於今十有五年竊據金陵亦十二年流毒海內神人共憤我

朝武功之盛超越前古屢次削平大難焜耀史編然如嘉慶川  
楚之役蹂躪僅及四省淪陷不過十餘城康熙三藩之役蹂躪  
尚止十二省淪陷亦第三百餘城今粵匪之變蹂躪竟及十六  
省淪陷至六百餘城之多而其中凶酋悍黨如李開方守馮官  
屯林啟容守九江葉芸來守安慶皆堅忍不屈此次金陵城破  
十餘萬賊無一降者至聚眾自焚而不悔實爲古今罕見之劇  
寇然卒能次第蕩平剗除元惡臣等深維其故蓋由我

文宗顯皇帝盛德宏謨早裕戡亂之本

宮禁雖極儉嗇而不惜鉅餉以募戰士名器雖極慎重而不惜  
破格以獎有功

廟算雖極精密而不惜屈已以從將帥之謀

皇太后

皇上守此三者悉循舊章而加之去邪彌果求賢而廣用能誅  
除僭偽肅成中興之業臣等忝竊兵符遭逢際會既痛我

文宗不及目覩獻誠告成之日又念生靈塗炭爲時過久惟當  
始終慎姑歸蕩餘匪以蘇子黎之困而分

宵旰之憂此次應獎應卹人員另繕清單籲懇

恩施臣

國藩拜摺後卽行馳赴金陵李秀成洪仁達應否獻俘

俟到金陵後察酌具奏所有金陵克復全股悍賊盡數殲滅緣

由謹會同陝甘總督臣

楊岳斌兵部侍郎臣

彭玉麟江蘇巡撫

臣李鴻章浙江巡撫即曾國荃恭摺由驛六百里加緊馳奏伏

乞

皇太后

皇上聖鑒訓示謹

奏

賊酋分別處治纏籌善後事宜摺

同治三年七月初七日

奏爲洪秀全李秀成二酋分別處治并纏籌善後事宜恭摺具

奏仰祈

聖鑒事

竊

於六月二十三日具奏克復金陵詳細情形於僞

天王幼主之寶在下落

李秀成等之應否獻俘聲明續奏在案

拜疏後

臣即乘坐輪船於二十五日駛抵金陵周歷各營接見

諸將均有憔悴可憐之色

蓋自五月三十日攻破地保城後連

攻十五晝夜未嘗少休

四面之兵挑集龍膊子一隅但出行隊

未支帳棚晝則日炙宵則露處

又出入地洞之中面目黎黑雖

與臣最熟之將初見幾不相識

其論功居首之李臣典因圖署

受傷督工過急克城後一病不起諸將士亦傷病山積死亡相屬臣弟曾國荃前病業已痊愈近因隨眾露處過久又復徧發溼毒臣帶兵多年克城數十罕見如此次之勞苦者臣宣道

皇仁多方撫慰既獎其可憫可敬之功復勸以忘勞忘死之義至僞天王洪秀全逆尸將士積斂之餘皆欲得而甘心直至六月二十七日始從僞宮內掘出二十八日扛至營次臣與臣弟國荃驗看臣所帶委員中有曾任刑部秋審處之勒方鑄龐際雲孫尚絅等暨各文武公同相驗該逆尸遵尚邪教不用棺木偏身皆用繡龍黃緞包裹雖袴腳亦係龍緞頭禿無髮鬚尚存已聞白矣左股右膀肉猶未脫驗畢戮尸舉烈火而焚之有

僞宮婢者係道州黃姓女子卽手埋逆尸者也臣親加訊問據供洪秀全生前經年不見臣僚四月二十七日因官軍攻急服毒身死祕不發喪而城內鑿賊城外官兵喧傳已徧十餘日始行宣布等語僞幼主洪福瑱繞室積薪爲城破自焚之計眾供皆合連日在僞宮灰燼之中反復搜尋茫無實據觀其金玉二印皆在巷戰時所奪又似業已逃出僞宮者李秀成之供則稱曾經挾之出城始行分散然此次逃奔之賊僅十六夜從地道缺口逸出數百人當經騎兵追至湖熟圍殺淨盡自十七日後曾國荃卽將缺口封砌關閉各城搜殺三日洪福瑱以十六歲童駢縱未斃於烈火亦必死於亂軍當無疑義所有僞玉璽二

方金印一方

臣當專差賈送軍機處俾方略館有所考焉李秀

成之就擒也各營之降卒附城之居民人人皆識觀者如堵

臣

二十五日甫至金陵親訊一次旋派候選道龐際雲候補知府

李鴻裔候補同知周悅修等鞠訊累日令寫親供多至數萬字

敘髮逆之始末述忠酋之戰事甚爲詳悉

臣復詢以江西李世

賢湖北馬融和湖州黃文金各股賊情據李秀成供湖州廣德

之賊即可不攻自遁馬融和一股东由陝西調援金陵因長江

阻隔久無來信李世賢係李秀成堂弟與之約定八月以前則

擄江西之糧以救侍黨之飢八月以後全數回竄圖解長圍則

擄甯國之糧以救金陵之飢等語又力勸官兵不宜專殺兩廣

之人恐粵賊愈孤逆黨愈固軍事仍無了日其言頗有可采日來在事文武皆請將李秀成檻送京師卽洋人戈登雅妥瑪等來賀者亦以忠逆解京爲快臣竊以

聖朝天威滅此小醜除僭號之洪秀全外其餘皆可不必獻俘陳玉成石達開卽有成例可援且自來元惡解京必須誘以甘言許以不死李秀成自知萬無可逭在途或不食而死或竄奪而逃翻恐逃顯戮而貽巨患與臣弟國荃熟商意見相同輒於七月初六日將李秀成凌遲處死傳首髮逆所到各省以快人心其僞福王洪仁達一犯係洪秀全之胞兄與其長兄洪仁發皆暴虐恣橫多行不義爲李秀成等所深憾亦於初四日凌遲

處死李秀成之供詞文理不甚通適而情事眞確謹鈔送軍機處以備查考臣既將各逆酋分別處治卽應料理善後事宜歷年以來中外紛傳洪逆之富金銀如海百貨充盈臣亦嘗與曾國荃論及城破之日查封賊庫所得財物多則進奉戶部少則畱充軍餉酌濟難民乃十六日克復以後搜殺三日不遑他顧僞宮賊館一炬成灰逮二十日查詢則并無所謂賊庫者訊問李秀成據稱昔年雖有聖庫之名實係洪秀全之私藏并非僞都之公帑僞朝官兵向無俸餉而王長兄次兄且用窮刑峻法搜括各館之銀米蘇州存銀稍多於金陵亦無公帑積儲一處惟秀成所得銀物盡數散給部下眾情翕然此外則各私其財

而公家貧困等語臣弟國荃以謂賊館必有窖藏賊身必有錢  
金勒令各營按名繳出以抵欠餉臣則謂勇丁所得賊賊多寡  
不齊按名勒繳弱者刑求而不得强者抗令而遁逃所抵之餉  
無幾徒損政體而失士心因曉諭軍中凡剝取賊身囊金者概  
置不問凡發掘賊館窖金者報官充公違者治罪所以憫其貧  
而獎其功差爲得體然克復老巢而全無貨財實出微臣意計  
之外亦爲從來罕聞之事而目下籌辦善後需銀甚急爲款甚  
鉅臣統軍太多卽擬裁撤三四萬人以節糜費應撤者欠餉無  
著應畱者口糧無措江甯生靈荼毒甚於他省欲撫卹此八屬  
災民經費亦無所出自上年五月起周歲之久官軍常有數百

人開挖地道縱橫計之城腳空虛約二十餘里賊自內挖出者  
不在此數理宜趕緊修築駐防滿營亦宜修理均難籌此巨款  
凡此皆善後之大端其餘增焦灼總督衙門卽係僞天王府之地片瓦無存現擇房屋之  
稍完者量加修葺爲臣衙署臣當回安慶一次料理上游軍事  
八九月閒再來金陵經畫一切除李臣典應得卹典另行專摺  
具奏外所有洪秀全李秀成二酋分別處治并嚴諭善後事宜  
恭摺由驛六百里馳奏伏乞

皇上聖鑒訓示謹

奏

謝錫封侯爵 恩摺 同治三年七月十六日

奏爲恭謝

天恩仰祈

聖鑒事竊臣於七月初十日准兵部火票遞到同治三年六月二十九日內閣奉

上諭欽差大臣協辦大學士兩江總督曾國藩自咸豐四年在湖南省首倡團練創立舟師與塔齊布羅澤南等屢建殊功保全湖南郡縣克復武漢等城肅清江西全境東征以來由宿松克潛山太湖進駐祁門疊復徽州郡縣遂拔安慶省城以爲根本分檄水陸將士規復下游州郡茲幸大功告成逆首誅鋤寶

由該大臣籌策無遺謀勇兼備知人善任調度得宜曾國藩著  
加恩賞加太子太保銜錫封一等侯爵世襲罔替並賞戴雙眼  
花翎等因欽此當卽恭設香案望

闕叩頭謝

恩訖伏念

臣忝膺疆寄於今五年德薄材庸無裨時局逮屯兵  
於建業愧師久而無功值甲子元會之

昌期復東南陸沈之重地此蓋仰託

累朝厚澤

聖主天威合億萬眾敵愾之心平十餘年稽誅之寇如臣碌碌  
何功可言迺復渥荷

恩綸特邀

曠典

錫以通侯之爵超諸丞弼之班更分

日月之重光俾煥雲霄之一羽

殊恩稠疊皆人臣罕覩之榮

天語褒嘉尤曠古非常之寵湖自楚師初興水陸並進實藉同  
澤同袍之力夫豈一手一足之勞厯年漸久人事變遷前此死  
事之臣旣埋忠而長逝卽今前驅之將尙苦戰而未休而臣謬

被

隆施先蒙

褒賞撫今追昔愧悚尤深臣惟有履冰知懼蹠垤自箴虞寢後而跋前常慎終而如始引英賢而競進冀氛祲之全消庶以仰答

高厚生成於萬一所有

微臣感激下忱謹繕摺專弁叩謝

天恩伏乞

皇太后

皇上聖鑒謹

奏

李臣典病故請卹摺

同治三年七月二十日

臣

奏爲一等子爵總兵李臣典病故請

旨交部議卹仰祈

聖鑒事竊記名提督歸德鎮總兵李臣典病故

臣

於七月初七

日聲明月摺請卹在案七月初十日欽奉六月二十九日

諭旨記名提督李臣典於鎗礮叢中搶挖地道誓死滅賊從倒口首先衝入眾軍隨之因而得手實屬謀勇過人著加恩錫封一等子爵並賞穿黃馬褂賞戴雙眼花翎欽此旋據曾國荃咨稱李臣典性情樸實忠勇絕倫治軍愛民井然有條料敵制勝毫髮不爽實爲難得之將以軍功游擢記名提督實授河南歸

德鎮總兵聞

命之日誓死報國不冀生還與國荃同居前敵已閱九年每當危險之際慷慨赴敵或以身翼蔽主將宛轉救護義形於色年纔二十七歲竟有名將之風六月十五日在地洞口受傷十六日克復金陵城池十七日因傷增病醫治無效二十日昇雨花台營次醫者謂傷及腰穴氣脈阻滯不久恐變喘症加以冒暑過勞難期痊可二十三日國荃親往省視李臣典不肯服藥自云此次萬無生理徒以

聖恩未報言之淚下並無一語及具家私卽於七月初二日已刻出缺其胞弟李臣榮李臣章料理後事卽日將歸原籍擇立

欽奉六月二十九日

上諭有錫爵之曠典有黃馬褂雙眼花翎之

懋賞李臣典竟不克親拜

寵命感

聖恩之優渥欵該員之數奇國荃私心痛悼寢食難忘謹將該員歷年在江西安徽及進兵金陵所立戰功臚列實跡開具清單應請詳晰代奏仰乞

優卹等情由曾國荃移咨前來臣覆查無異茲將李臣典戰功

清單錄呈

御覽可否籲懇

皇上天恩直付

國史館立傳

敕部優卹

特旨予謚并於江西吉安府安慶金陵建立專祠以彰忠蓋出

自逾格

鴻施所有李臣典病故請卹緣由恭摺由驛馳奏伏乞

皇太后

皇上聖鑒訓示謹

奏

覆陳逆酉正法片

同治三年七月二十日

再<sub>臣</sub>於七月初十日欽奉六月二十九日

寄諭逆首李秀城洪仁達等均係內地亂民不必獻俘第該逆等罪惡貫盈自應懲送京師審明後盡法懲治以洩神人之憤著曾國藩遴派妥員將李秀城洪仁達押解來京並咨明沿途督撫督飭地方文武多派兵役小心護送毋稍大意等因欽此<sub>臣</sub>於六月二十三日報捷摺內聲明李秀城洪仁達應否解京俟到金陵後察酌具奏旋於二十五日馳抵金陵詢及李秀城權術要結頗得民心城破後竄逸鄉間鄉民憐而匿之蕭寧泗生擒李逆之後鄉民竟將親兵王三清捉去殺而投諸水中若

代李逆報私忿者李秀城既入囚籠次日又擒僞松王陳德風到營一見李逆卽長跪請安

臣聞此二端惡其民心之未去黨

羽之尙堅卽決計就地正法獻後鞠訊累曰觀者極眾營中文武各員始則紛紛請解京師繼則因李秀城言能收降江西湖州各股又紛紛請貸其一死畱爲雉媒以招餘黨臣則力主速殺免致疏虞以貽後患遂於初六日正法初七日錄供具奏其洪仁達一犯雖據李秀城供在賊中暴虐專權而如醉如癡口稱天父不絕無供可錄因其抱病甚重已於初四日先行處死矣初十日始奉將二酋解京之

旨扣算日期

臣處應於初六日接到

批旨乃驛站由安慶轉遞江甯致遲四日之久臣查軍機處封面及兵部火票皆注明遞至江甯字樣不知驛站何處錯誤應卽行文挨站查辦又欽奉六月二十九日

諭旨洪秀全屍身覓獲後剉屍梟示仍傳首被害地方以雪眾憤欽此臣於六月二十八日驗明洪逆正身卽行戮屍焚化未將首級畱傳各省是臣識見不到之咎欽奉

諭旨訓示不勝惶悚至軍機處交片查取僞玉璽二顆金印一顆臣於十六日專差賚送謝

恩摺件并將三印附送軍機處矣理合附片覆奏伏乞  
皇太后

皇上聖鑒謹

奏

近日軍情擬裁撤湘勇片

同治三年七月二十日

再臣欽奉六月二十九日

寄諭廣德等處如有踞賊曾國荃尚須駐紮江甯卽由曾國藩派撥兵隊乘勢掃蕩勿稍延緩等因欽此臣初到金陵擬令將士休息一月卽派勦廣德等處乃諸將盛暑糜兵病者甚多紛紛稟請撤勇回籍臣以皖浙未靖本不欲遽撤多營惟念近歲以來但見增勇不見裁撤無論食何省之餉所吸者皆斯民之脂膏所損者皆

國家之元氣前此賊氛方盛萬不得已屢募屢增以救一時之急今幸老巢既破大局粗定裁一勇卽節一勇之糜費亦卽銷

無窮之後患諸將之願遣散歸籍蓋未始非臣之幸未始非大局之幸因與臣弟國荃商定將金陵全軍五萬人裁撤一半酌畱二萬數千人分守金陵蕪湖金柱關各要隘其餘作爲游擊之師進剿廣德等處而曾國荃克城之後困憊殊甚徹夜不寐有似怔忡據稱心血過虧萬難再當大任恐致僨事意欲奏請回籍一面調理病軀一面親率遺撤之勇部勒南歸求所爲善聚不如善散善始不如善終之道臣囑以苟可支持不必遽請開缺如在金陵安心調理代臣料理善後事宜臣卽曰仍回安寧一次俟上游布置粗定再行馳赴江甯藩司萬啟琛運司忠寧昨來金陵接見亦須仍回泰州一次俟彼中清釐就緒再行

分駐江揚二府至於鎮江之兵臣與馮子材面商似可全行裁撤俟蘇軍接防鎮江丹陽卽當次第遣散揚州之兵臣與富明阿面商目下尙難遽撤俟鄂中髮捻趨向大定乃可酌量裁減軍興日久各有厭苦兵間之意但使欠餉有著遣散時當不至別生枝節足慰

宸廩江西軍務鮑超於七月初四在許灣大獲勝仗據報平壘七十餘座殺賊四萬有奇崇宣等縣或亦易於得手楊岳斌過安慶時臣與之商定以後鮑超周窺世戰狀卽歸該督主稿會奏矣所有近日各路軍情理合附片馳陳伏乞

皇太后

皇上聖鑒訓不謹

奏

停止廣東釐金摺

同治三年七月二十九日

奏爲停止廣東釐金並請加廣該省鄉試中額恭摺奏陳仰祈  
聖鑒事竊臣於同治元年奏請開辦廣東釐金接濟浙江安徽  
江蘇三省軍餉仰蒙

欽派都察院右副都御史晏端書馳赴廣東竭力經營分批撥  
解皖浙各軍兩年以來深資饋運本年三月間臣於滌陳餉絀  
情形摺內聲明廣東七成之釐非臣分內應得之餉應俟軍務  
稍定卽由臣奏請先行停止在案現在江甯省城幸已告克臣  
統軍太多擬卽次第遣撤籌裁勇之欠餉發征兵之行糧需款  
甚鉅各處釐卡應仍照舊徵收惟廣東釐金一款臣爲拯貧之

策幾蹈專利之名私衷耿耿如負重疚應請

旨飭下廣東督撫所有廣東釐金截至本年八月三十日止全充本省兵餉毋庸再解臣營以踐前言而紓鄰困此項釐金自元年七月起至本年四月止除畱歸該省軍需局外實解皖營及浙江軍營一百一十萬兩若截至八月底當在百二十萬以外該省商民踴躍輸將成此巨數俾臣藉以殲除金陵首逆爲利甚溥查部定章程凡捐輸銀三十萬兩准加文武鄉試定額各一名合無仰懇

天恩俯准將粵釐照一百二十萬兩之數加廣東省文武鄉試永遠定額各四名以贊

聖主如天之仁而彰曆人急公之義臣又查捐輸定章於本身應得獎敘外復准通縣合算加廣學額通省合算加廣中額係專指捐輸言之若抽釐濟餉則既無給獎本身之條更無合算加額之例惟各省釐金皆由本管督撫派員經收軍興既久幾與丁漕關稅同爲歲入正款商民亦習而安之自不可給獎加額致滋冒濫若廣東釐金兩年以來專濟三江之餉與各省大有區別除本年照例不得給獎外可否通省合算加廣中額之處出自

聖主鴻裁交部核議施行所有停止粵釐緣由恭摺馳奏伏乞  
皇太后

皇上聖鑒訓示謹

卷之二十一

三

裁撤湘勇查洪福瑱下落片

同治三年七月二十九日

再七月二十四五日臣在舟次疊奉七月十一十四十五等日  
寄諭訓飭之事甚多而遣撤勇士及查洪福瑱下落二事  
宸廑尤切伏讀

諭旨有云裁撤兵勇雖爲節餉起見然驟撤三四萬人恐此輩  
久在戎行不能省事必至隨處嘯聚爲亂從前川楚善後積至  
數年方始肅清可爲殷鑒不若先汰老弱而以精壯各軍分赴  
江楚俟江楚一律肅清再議裁撤歸農或挑補各營兵額俾不  
致復生枝節方爲盡善等因欽此臣以欠餉太鉅後患無窮久  
思大加裁撤以節糜費嗣與臣弟曾國荃酌商防戍之兵與游

擊之師不宜太少定將金陵全軍五萬人裁撤一半於七月二十日續奏在案湘勇召募之初選擇鄉里農民有業者多無根  
者少但使欠餉有著當可安靜回籍不致別生枝節至挑補兵  
額之說近多建此議者臣竊不以爲然蓋勇士之口糧一倍於  
馬兵三倍於守兵馬糧之缺極少守糧月支一兩斷不足供衣  
食之需誰肯於數千里外補一衣食不敷之缺欲以湖南樸實  
之勇補三江綠營之兵必不情願其願補者皆游惰無歸者也  
此事另奉

諭旨鈔發陳廷經之條奏飭令妥辦臣愚以爲勇則遣回原籍  
兵則另募土著各返本而復始庶爲經久可行之道

諭旨又云昨據曾國藩奏洪福瑱積薪自焚茫無實據似已逃出僞宮李秀城供曾經挾之出城後始分散其爲逃出已無疑義湖熟防軍所報斬殺淨盡之說全不可靠著曾國藩查明此外究有逸出若干并將防範不力之員弁從重參辦等因欽此臣初聞金陵克復亦深慮極大之城必多竄逸之賊湖熟追殺淨盡之說臣亦不敢深信迨臣至江甯小住經旬距克城已閱二十日而附近如溧水句容丹陽高淳東壩建平各防之將各縣之官弁未稟報有賊匪竄過之事臣弟所派各路跟查之弁亦自東壩溧陽等處歸來報稱沿途百姓未見有賊蹤經過之事臣於是釋然大慰以爲洪福瑱必死於亂軍無疑矣旋於七

月十一日接甯國守將劉松山及委員陳斌稟稱洪福瑱帶二  
三千人逃至廣德旋又見左宗棠寄臣弟函稱僞幼主率賊二  
三千人逃入廣德迎至湖州皆云係逃出難民所供十三日接  
浙江糧道楊昌濬稟亦云洪福瑱帶二三千人竄至廣德十四  
日左宗棠寄臣一函則云金陵餘逆漏出數百亦有數千之說  
與劉松山楊昌濬所云二三千者微有不符臣再三推詳由金  
陵至廣德縣縣有兵層層密布其中如駐句容之劉銘傳駐溧  
水之王可陞駐建平之李榕駐東壩之鄭魁武皆聽事不欺之  
人又奉嚴防逸賊之札若謂洪福瑱僅帶零賊雜髮潛遁此數  
處者或不知之若賊至二三千之眾而謂此數處一無聞見既

不截勦又不稟報此事理所必無也臣觀附近各縣各將之無  
稟證以李秀城之親供逸出漏網之賊多亦不過數百堪以仰  
慰

宸廬其洪福瑱果否尙存臣現派蓄髮降卒四處訪查不欲僅  
以難民之言爲憑尙未訪有端倪至防範不力之員弁是夕賊  
從缺口衝出我軍巷戰終日并未派有專員防守缺口無可指  
之汛地礙難查參且杭州省城克復時僞康王汪海洋僞聽王  
陳炳文兩股十萬之眾全數逸出尙未糾參此次逸出數百人  
亦應暫緩參辦賊情詭譎或洪福瑱實已身死而黃文金僞稱  
尙存亦古來敗賊常有之事應俟查明洪福瑱實在下落續行

具奏抑臣更有幸者向使破城之夜該逆大開十三門每門衝出數百人不僅由缺口一路官軍亦未必能悉數截勦向使李秀城不因鄉民爭匿羈延時刻官軍亦未必能既脫復擒今之逸賊無幾渠魁就縛蓋全仗

皇太后

皇上之福非臣兄弟之力所能及此也除

諭旨垂詢各事另行分條覆奏外謹將此二事先行附片馳陳伏乞

皇太后

皇上聖鑒訓示謹

奏

近日軍情片

同治三年七月二十九日

再近日軍情江西之賊占踞許灣者爲僞康王汪海洋一股經鮑超於七月初四破其長濛殺賊數萬分踞東鄉金谿者爲僞聽王陳炳文一股逼我許灣之戰遂於初十一兩日棄東鄉金谿兩城陸續退遁率眾求撫據鮑超寄到陳炳文投誠稟帖共有黨眾六萬餘人洋鎗隊七千餘人皆願效順等語此二股皆由杭州竄出者分踞崇仁宜黃之賊爲僞侍王李逆一股經江忠朝等於十一十二兩日次第克復南豐之賊爲僞涪王譚逆一股經鮑超於十八日克復此二股係由湖州溧陽先後竄出者一切調度想楊岳斌沈葆楨已經詳奏欽奉

諭旨飭臣酌派金陵陸師赴江協勦目下江西軍威大振無須添派援江之兵矣臣所慮者在皖北英霍一路皖南廣德一路而金陵之師急切不能起程應遣撤者無由籌給欠餉應出勦者無由籌發行糧不料老巢既破而餉絀若此皆臣經理不善之咎前派鮑超一軍馳援江西發給行糧十萬賴有總理衙門撥濟巨款得以成行刻下不惟無此巨款而金陵既克廣東之釐金不能不歸還本省江西一半之釐金除西饒景二卡接濟徽軍兵米此外亦全畱江西發鮑超周寬世兩軍之餉更無涓滴解赴皖台臣軍現入之款惟湖南東征局與安徽沿江釐金兩項月計所入不過數萬以供皖南北兩岸防兵不敷尚鉅更

無餘力分濟金陵裁兵之欠餉與出勦之行糧臣再四思維訖  
無善策擬卽曰札派江蘇官紳在於上海勸捐並函商李鴻章  
酌分松滬釐金撥解臣軍不識能否有濟湖北之賊尙盤結羅  
田麻城一帶僧格林沁已調陳國瑞進剿麻城英翰進剿商城  
喬松年調蔣凝學之兵進剿英山臣亦調李榕之兵駐防桐城  
布置尙密惟無大枝勁旅痛加勦洗尙爲湖北皖豫三省之患  
所有近日軍情理合附片馳陳伏乞

皇太后

皇上聖鑒訓示謹

奏